

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৩০/২০১৭-১৮

ঢাকা, বৃহস্পতিবার ১০ আগস্ট ২০১৭, ২৬ শ্রাবণ ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। চট্টগ্রাম শহরের জলাবদ্ধতা নিরসনে সাড়ে পাঁচ হাজার কোটি টাকার প্রকল্প একনেকে অনুমোদন
- ২। এক লাখ টন চাল ও গম আমদানির প্রস্তাব ত্রয় সংক্রান্ত মন্ত্রিসভা কমিটিতে অনুমোদন
- ৩। কোনো ষড়যন্ত্রই তৈরি পোশাক খাতের চলমান অগ্রগতি ব্যাহত করতে পারবে না : শিল্পমন্ত্রী
- ৪। এইডস নির্মূলে বাংলাদেশ একযোগে কাজ করবে : স্বাস্থ্যমন্ত্রী
- ৫। গাজীপুরে টাম্পাকো অগ্নিকাণ্ডের মামলা চলবে : স্বরাষ্ট্রমন্ত্রী
- ৬। বঙ্গবন্ধুর খুনীদের শীঘ্রই দেশে ফিরিয়ে আনা হবে : আইনমন্ত্রী
- ৭। এসডিজি অর্জনে স্থিতিশীল রাজনৈতিক পরিবেশ জরুরি : বনমন্ত্রী
- ৮। সব্যসাচী লেখক সৈয়দ শামসুল হক স্মরণে কুড়িগ্রামে স্মৃতি কমপ্লেক্স নির্মাণ করা হবে : সংস্কৃতিমন্ত্রী
- ৯। ১৬শ'কোটি টাকার ঋণ অনুমোদন এডিবি'র

১। চট্টগ্রাম শহরের জলাবদ্ধতা নিরসনে সাড়ে পাঁচ হাজার কোটি টাকার প্রকল্প একনেকে অনুমোদন

চট্টগ্রাম শহরের জলাবদ্ধতা নিরসনে পাঁচ হাজার ৬১৬ কোটি ৫০ লাখ টাকার একটি বৃহৎ প্রকল্প বাস্তবায়নের উদ্যোগ নিয়েছে সরকার। এ প্রকল্পের আওতায় খাল খনন ও সম্প্রসারণ এবং ড্রেনেজ ব্যবস্থা উন্নত করা হবে। এতে বৃষ্টির পানি দ্রুত নিষ্কাশন হবে। এ লক্ষ্যে জাতীয় অর্থনৈতিক পরিষদের নির্বাহী কমিটি (একনেক) গতকাল ৯ আগস্ট বুধবার 'চট্টগ্রাম শহরের জলাবদ্ধতা নিরসনকল্পে খাল পুনঃখনন, সম্প্রসারণ, সংস্কার ও উন্নয়ন' শীর্ষক প্রকল্পসহ মোট ১১ প্রকল্পের চূড়ান্ত অনুমোদন দিয়েছে। এসব প্রকল্প বাস্তবায়নে মোট ব্যয় ধরা হয়েছে ৯ হাজার ৭৬১ কোটি ২৪ লাখ টাকা। এর মধ্যে সরকারি তহবিল থেকে ৮ হাজার ২৬৭ কোটি ৮৬ লাখ টাকা, বাস্তবায়নকারী সংস্থার নিজস্ব তহবিল থেকে ৭০৩ কোটি ৩৮ লাখ টাকা এবং বৈদেশিক সহায়তা থেকে পাওয়া যাবে ৭৯০ কোটি টাকা। রাজধানীর শেরেবাংলা নগরে এনইসি সম্মেলনকক্ষে প্রধানমন্ত্রী শেখ হাসিনার সভাপতিত্বে অনুষ্ঠিত একনেক বৈঠকে এসব প্রকল্পের অনুমোদন দেওয়া হয়। সূত্র-সংবাদ (শেষ পৃ.,ক.২), ইত্তেফাক (পৃ.১,ক.৬), এশিয়ান এজ (শেষ পৃ.,ক.১), বাংলাদেশ টুডে (শেষ পৃ.,ক.৫)।

২। এক লাখ টন চাল ও গম আমদানির প্রস্তাব ক্রয় সংক্রান্ত মন্ত্রিসভা কমিটিতে অনুমোদন

দু'টি আলাদা প্রস্তাবে ৫০ হাজার টন করে মোট এক লাখ টন চাল ও গম আমদানির প্রস্তাব অনুমোদন দেওয়া হয়েছে। এছাড়া ৭৮৬ কোটি ৯২ লাখ টাকা ব্যয়ে ১১টি ক্রয় প্রস্তাবসহ বেসরকারি খাতে ১০টি বিদ্যুৎকেন্দ্র স্থাপনের ক্রয় প্রস্তাব রয়েছে। গতকাল ৯ আগস্ট বুধবার সচিবালয়ে অর্থমন্ত্রী আবুল মাল আবদুল মুহিতের সভাপতিত্বে সরকারি ক্রয় সংক্রান্ত মন্ত্রিসভা কমিটির বৈঠকে ক্রয় প্রস্তাবগুলো অনুমোদন দেওয়া হয়। সূত্র-জনকণ্ঠ (পৃ.১,ক.৭), যুগান্তর (পৃ.২,ক.৪), অবজারভার (পৃ.১,ক.৬), ইন্ডিপেনডেন্ট (পৃ.২,ক.৭)।

৩। কোনো ষড়যন্ত্রই তৈরি পোশাক খাতের চলমান অগ্রগতি ব্যাহত করতে পারবে না : শিল্পমন্ত্রী

দেশের প্রধান রফতানি পণ্য তৈরি পোশাক খাত নিয়ে আন্তর্জাতিক ষড়যন্ত্র অব্যাহত আছে বলে মন্তব্য করেছেন শিল্পমন্ত্রী আমির হোসেন আমু। তবে কোনো ষড়যন্ত্রই এ খাতের চলমান অগ্রগতি ব্যাহত করতে পারবে না। সরকার এ শিল্পের উন্নয়নে কাজ করে যাচ্ছে। ইতোমধ্যে কর্মপরিবেশের উল্লেখযোগ্য উন্নয়ন হয়েছে। শ্রমিকদের মজুরি বেড়েছে। এ খাতের মাধ্যমে বড় অঙ্কের রফতানি আয় ছাড়াও নারীর ক্ষমতায়নের কাজটি এগিয়ে চলেছে। এর মাধ্যমে টেকসই উন্নয়ন লক্ষ্যমাত্রা (এসডিজি) অর্জনও সহজ হবে বলে মনে করেন তিনি। রাজধানীর বসুন্ধরা আন্তর্জাতিক কনভেনশন সিটিতে গতকাল ৯ আগস্ট বুধবার টেক্সটাইল পণ্যের যন্ত্রপাতির প্রদর্শনীর উদ্বোধন অনুষ্ঠানে প্রধান অতিথির বক্তব্যে তিনি এসব কথা বলেন। সূত্র-সমকাল (পৃ.১২,ক.৫), ইত্তেফাক (পৃ.১৫,ক.৪), অবজারভার (পৃ.৪,ক.৪), এশিয়ান এজ (পৃ.১১,ক.১)।

৪। এইডস নির্মূলে বাংলাদেশ একযোগে কাজ করবে : স্বাস্থ্যমন্ত্রী

স্বাস্থ্যমন্ত্রী মোহাম্মদ নাসিম বলেছেন, দক্ষিণ-পূর্ব এশীয় অঞ্চলে এইডস নির্মূলের লক্ষ্যে বাংলাদেশ আঞ্চলিক সহযোগিতা বৃদ্ধির মাধ্যমে একযোগে কাজ করে যাবে। এই অঞ্চলের জনগণের স্বাস্থ্যমানের উন্নয়নে দেশগুলো পারস্পরিক সহায়তা জোরদার করে ইতোমধ্যে সাফল্য পেয়েছে। আগামীতে সম্পদ ও অভিজ্ঞতা বিনিময়ে গতিশীলতা বাড়িয়ে টেকসই উন্নয়ন লক্ষ্যমাত্রা অর্জনে বাংলাদেশ সব দেশের সহযোগিতা চায়। গতকাল ৯ আগস্ট বুধবার সচিবালয়ে দক্ষিণ-পূর্ব এশীয় অঞ্চলে এইচআইভি ও এইডস এবং তৃতীয় লিঙ্গের জন্য প্রয়োজনীয় কর্মসূচি পর্যবেক্ষণের লক্ষ্যে বাংলাদেশে সফররত শ্রীলঙ্কা ও ভুটানের প্রতিনিধি দলের সঙ্গে মতবিনিময় অনুষ্ঠানে প্রধান অতিথির বক্তব্যে তিনি এ কথা বলেন। সূত্র-জনকণ্ঠ (পৃ.৩,ক.৪), ইনকিলাব (শেষ পৃ.,ক. ৫), অবজারভার (পৃ.১০,ক.১)।

৫। গাজীপুরে টাম্পাকো অগ্নিকাণ্ডের মামলা চলবে : স্বরাষ্ট্রমন্ত্রী

স্বরাষ্ট্রমন্ত্রী আসাদুজ্জামান খাঁন কামাল বলেছেন, টাম্পাকো অগ্নিকাণ্ডে দায়ের করা মামলা চলবে। নিহতের ঘটনায় পুলিশ একটি তদন্ত রিপোর্ট জমা দিয়েছে, পাশাপাশি পৃথক আরেকটি তদন্ত হয়েছে। সবগুলো তদন্তই সম্পন্ন হয়েছে, যথাযথভাবেই বিচারকার্য শেষ হবে। গতকাল ৯ আগস্ট বুধবার গাজীপুরের টঙ্গীতে টাম্পাকো ফয়ল্‌স কারখানার নতুন ভবনের ভিত্তিপ্রস্তর স্থাপন অনুষ্ঠানে মন্ত্রী এসব কথা বলেন। সূত্র-ইত্তেফাক (পৃ.৫,ক.১), যুগান্তর (পৃ.২,ক.৪), বাংলাদেশ টুডে (শেষ পৃ.,ক.৬)।

৬। বঙ্গবন্ধুর খুনীদের শীঘ্রই দেশে ফিরিয়ে আনা হবে : আইনমন্ত্রী

আইনমন্ত্রী এডভোকেট আনিসুল হক বলেছেন, জাতির পিতা বঙ্গবন্ধু শেখ মুজিবুর রহমানের বিদেশে পলাতক খুনীদের অবস্থান শনাক্ত করা হয়েছে। কূটনৈতিক চ্যানেলের মাধ্যমেই তাদের ফিরিয়ে আনার চেষ্টা চলছে। তাদের দেশে ফিরিয়ে এনে রায় কার্যকরের জন্য সরকার কাজ করছে। গতকাল ৯ আগস্ট বুধবার সচিবালয়ে আইন, বিচার ও সংসদ বিষয়ক মন্ত্রী এ কথা বলেন। সূত্র-জনকণ্ঠ (পৃ.১,ক.২), এশিয়ান এজ (পৃ.১,ক.৪), ফিনানশিয়াল এক্সপ্রেস (পৃ.২,ক.৬)।

৭। এসডিজি অর্জনে স্থিতিশীল রাজনৈতিক পরিবেশ জরুরি : বনমন্ত্রী

পরিবেশ ও বনমন্ত্রী আনোয়ার হোসেন মঞ্জু বলেছেন, টেকসই উন্নয়ন লক্ষ্যমাত্রা (এসডিজি) অর্জনে স্থিতিশীল রাজনৈতিক পরিবেশ জরুরি। তিনি বলেন, উন্নয়নকে ধরে রাখতে হলে সমাজ এবং রাজনীতির গতিধারা কী হবে তা নির্ধারণ করতে হবে। এ ক্ষেত্রে সবচেয়ে জরুরি ইতিবাচক মানসিকতা। গতকাল ৯ আগস্ট বুধবার টেকসই উন্নয়ন অভিষ্ট-১৩ অর্জনে খসড়া কর্মপরিকল্পনা পর্যালোচনা শীর্ষক কর্মশালার উদ্বোধন অনুষ্ঠানে প্রধান অতিথির বক্তব্যে তিনি এসব কথা বলেন। সূত্র-সমকাল (পৃ.৪,ক.৫), ইত্তেফাক (শেষ পৃ.,ক.৫)।

৮। সব্যসাচী লেখক সৈয়দ শামসুল হক স্মরণে কুড়িগ্রামে স্মৃতি কমপ্লেক্স নির্মাণ করা হবে : সংস্কৃতিমন্ত্রী

সংস্কৃতিমন্ত্রী আসাদুজ্জামান নূর বলেছেন, সব্যসাচী লেখক সৈয়দ শামসুল হকের স্মৃতি ধরে রাখার জন্য খুব শীঘ্রই তাঁর কুড়িগ্রামের সমাধিকে ঘিরে একটি স্মৃতি কমপ্লেক্স নির্মাণ করা হবে। যেন তাঁর গ্রন্থ, রচনাসমগ্র ও কর্ম সম্পর্কে মানুষ যুগ-যুগ ধরে জানতে পারে। মন্ত্রী গতকাল ৯ আগস্ট বুধবার কুড়িগ্রাম সরকারি কলেজ প্রাঙ্গণে সব্যসাচী লেখক সৈয়দ শামসুল হকের সমাধিস্থল পরিদর্শন ও কবর জিয়ারত শেষে এ কথা বলেন। সূত্র-জনকণ্ঠ (পৃ.৯,ক.৭), সমকাল (পৃ.১৯,ক.১)।

৯। ১৬শ'কোটি টাকার ঋণ অনুমোদন এডিবি'র

দেশের ৩৫টি পৌরসভার অবকাঠামো উন্নয়ন, সেবার মান ও সুশাসন জোরদারে নেওয়া একটি প্রকল্পে এশীয় উন্নয়ন ব্যাংক (এডিবি) অতিরিক্ত ২০ কোটি ডলার ঋণ দেবে। এডিবি'র ঢাকা কার্যালয় গতকাল ৯ আগস্ট বুধবার জানায়, ম্যানিলাতে সংস্থাটির পরিচালনা পর্ষদ এ সপ্তাহে এই ঋণ অনুমোদন করেছে। বাংলাদেশি মুদ্রায় ঋণের পরিমাণ ১৬শ' কোটি টাকা। সূত্র-সমকাল (পৃ.১২,ক.৪), ইত্তেফাক (পৃ.১৮,ক.৫), অবজারভার (পৃ.১৭,ক.৬), এশিয়ান এজ (শেষ পৃ.,ক.৫)।

- ক. **ইত্তেফাক** : চট্টগ্রাম বন্দর ও চাক্তাই খাতুনগঞ্জসহ চট্টগ্রাম নগরীতে নতুন নতুন শিল্প-কারখানা স্থাপিত হওয়ায় নগরীতে ভারী যানবাহন চলাচলে প্রয়োজনীয় সংখ্যক টার্মিনাল না বাড়ার কথা উল্লেখ করে এ ব্যাপারে কার্যকর উদ্যোগ নেওয়ার সুপারিশ।
- খ. **ভোরের কাগজ** : পেঁয়াজের দাম অস্বাভাবিক ভাবে বেড়ে যাওয়ায় মূল্য নিয়ন্ত্রণে নজরদারির সুপারিশ।
- গ. **যায়যায়দিন** : মালয়েশিয়ান কর্তৃপক্ষ সন্ত্রাসবিরোধী এক অভিযানে যে ৪০০ এর বেশি মানুষকে গ্রেপ্তার করেছে, তাদের মধ্যে অবৈধ বাংলাদেশি অভিবাসী থাকায় উদ্বেগ প্রকাশ করে এ ধরনের অনাকাঙ্ক্ষিত ঘটনা রোধে বিদেশে বৈধ উপায়ে দক্ষ কর্মী পাঠানোর ওপর গুরুত্বারোপ।
- ঘ. **প্রথম আলো** : সমবায় অধিদপ্তর কর্তৃক প্রকাশিত একটি প্রতিবেদনে বিভিন্ন প্রতারক সমবায় সমিতি সাধারণ মানুষের কাছ থেকে আমানত সংগ্রহ করার পর আর তা ফেরত দিচ্ছে না এ তথ্য প্রকাশিত হওয়ায় এদের বিরুদ্ধে কঠোর প্রদক্ষেপ নেওয়ার পাশাপাশি সাধারণ মানুষকেও এ ব্যাপারে সচেতন হওয়ার আহ্বান।
- ঙ. **ইন্ডিপেন্ডেন্ট** : বর্তমানে দেশে মাছের উৎপাদন বিগত তিন দশকে প্রায় ২৫ গুণ বেড়ে যাওয়ার পরিপ্রেক্ষিতে দেশীয় মাছগুলোকে বিলুপ্তির হাত থেকে রক্ষায় যথাযথ পদক্ষেপ নেওয়ার সুপারিশ।
- চ. **ডেইলি সান** : অর্থনৈতিক জোনে অবস্থিত শিল্প কারখানায় প্রাকৃতিক গ্যাসের সর্বোচ্চ ব্যবহার নিশ্চিত করাসহ গ্যাসের অপচয় বন্ধে কঠোর ব্যবস্থা নেওয়ার আহ্বান।
- ছ. **নিউজ টুডে** : ঢাকা বিশ্ববিদ্যালয়ের ফাইন আর্টস ফ্যাকাল্টি ও জহুরুল হক হলে বৃষ্টির পানি সংরক্ষণ করে ব্যবহার করার পাইলট প্রকল্পের সাফল্যে রাজউককে সেটি ঢাকা শহরের ৩ লক্ষ নির্ধারিত ভবনের ওপর বাধ্যতামূলকভাবে প্রয়োগের ব্যবস্থা করে ক্রমান্বয়ে তা সবার ওপরই বাধ্যতামূলক করার প্রত্যাশা।
- জ. **নিউ নেশন** : চট্টগ্রাম বন্দরের সরকারি খাদ্য গুদাম থেকে ৯০ কোটি টাকা মূল্যমানের ৩৩ হাজার মেট্রিক টন গম চুরি হওয়ার খবরে উদ্বেগ প্রকাশ করে ঘটনায় জড়িতদের চিহ্নিত করে দৃষ্টান্তমূলক শাস্তির ব্যবস্থা করা না হলে এ ধরনের ঘটনার পুনরাবৃত্তি হওয়ার আশঙ্কা প্রকাশ করে সম্পাদকীয় প্রকাশ।

উপ-সম্পাদকীয়

যায়যায়দিন পত্রিকায় প্রকাশিত কলামে উল্লেখ করা হয়েছে, সমাজকে অপরাধ প্রবণতা থেকে রক্ষা এবং সুস্থ-সুন্দর যোগাযোগ নিশ্চিত করার জন্য আমাদের দেশে সামাজিক যোগাযোগ মাধ্যমগুলোর ওপর আরও কার্যকর নিয়ন্ত্রণ প্রতিষ্ঠা করা প্রয়োজন।

নিবন্ধ ও ফিচার

সমকাল পত্রিকায় প্রকাশিত 'সড়ক বিভাজক বৃক্ষ ও বাসযোগ্য শহর' শিরোনামের নিবন্ধে অভিমত প্রকাশ করা হয়েছে, নগর পরিকল্পনায় সড়ক বিভাজক, পার্ক, লেকের পাড়, নদীর তীরবর্তী অঞ্চল পরিবেশ উপযোগী বৃক্ষরোপণের আওতায় আনার মাধ্যমে আমাদের শহর হয়ে উঠতে পারে সবুজ এবং প্রাণী ও মানুষের বাসযোগ্য।

#

ডালিয়া/ফাহিমা/শুকলা/মরজিনা/সাইদা/রশীদ/তানিয়া/২০১৭/৯.০০ ঘণ্টা

